

## THOMAS, WILLIAM (1613 - 1689), esgob

**Enw:** William Thomas  
**Dyddiad geni:** 1613  
**Dyddiad marw:** 1689  
**Priod:** Blanche Thomas (née Samyne)  
**Rhiant:** Elizabeth Thomas (née Blount)  
**Rhiant:** John Thomas  
**Rhyw:** Gwryw  
**Galwedigaeth:** esgob  
**Maes gweithgaredd:** Crefydd  
**Awdur:** Thomas Iorwerth Ellis

Ganwyd ym Mryste, 2 Chwefror 1613, mab John Thomas o Fryste (gynt o Gaerfyrddin) ac Elizabeth ei wraig. Cafodd ei addysg yn ysgol ramadeg Gaerfyrddin, ac ymaelodi ym Mhrifysgol Rhydychen o Goleg S. Ioan, 13 Tachwedd 1629; graddiodd yn B.A. o Goleg Iesu, Mai 1632, ac M.A. Chwefror 1634/5. Bu hefyd yn gymrawd ac yn athro yng Ngholeg Iesu. Ordeiniwyd ef yn ddiakon yn 1637 ac yn offeiriad yn 1638 gan yr esgob Bancroft o Rydychen; daeth yn ficer Penbryn, Sir Aberteifi, ac yn gaplan i iarll Northumberland. Penododd hwnnw ef yn ficer Talacharn a Llansadwrnyn yn Sir Gaerfyrddin. Trowyd ef o'i swydd yn 1644, ac aeth i gadw ysgol yn Nhalacharn; yn 1660 adferwyd ef a'i benodi'n gantor Tyddewi. Wedyn daeth yn rheithor Llanbedr Efelffre, Sir Benfro, ac yn gaplan i ddug Caer Efrog; ac yn Nhachwedd, 1665, penodwyd ef yn ddeon Caerwrangon. Ddwy flynedd yn ddiweddarach cysegrwyd ef yn esgob Tyddewi; parhaodd yn ei ddeoniaeth. Bu'n esgob Tyddewi am chwe blynedd, ac yn ystod y cyfnod hwnnw bu mawr ofal ganddo dros fuddiannau'r esgobaeth; pregethai yn Gymraeg, hyrwyddai gyhoeddiadau Cymraeg [Thomas Gouge](#) a [Stephen Hughes](#), a dechreuodd atgyweirio plasau'r esgob yn Abergwili ac Aberhonddu. Symudwyd ef i Gaerwrangon yn esgob yn 1683, a bu farw yno 25 Mehefin 1689. Claddwyd ef yn eglwys gadeiriol Caerwrangon. Yr oedd yn briod, a chanddo wyth plentyn.

### Awdur

Thomas Iorwerth Ellis, (1899 - 1970)

### Ffynonellau

*Oxford Dictionary of National Biography*

### Dolenni Ychwanegol

VIAF: [27413081](#)

Wikidata: [Q8019291](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

